

(海陸腔) 編號 01 號

【鬧熱个落水天】 曾菁怡原作

鬧鐘鈴～鈴～鈴～響咧！大嫲聲喊佢遽遽跣床，再過忍床就會赴毋掣去學校讀書咧。佢目西西伸手揪忒鬧鐘，又過橫落舒適个眠床，毋盼得摻佢分開。欸！毋係天光咧？外背仰還係暗摸胥疏？探頭看出去，原來係天公派烏雲使者來通知佢兜——愛落水咧！

有人認為落水天係麻煩天，出門愛著水衣，無就擎遮仔，係無細義，衫褲又會涿到溼溶溶仔，去哪就毋方便。學生仔最惱無法度出去打球仔、搞寮，一下課先生就掌等，麼人都做毋得出去涿水，所以一看啊著落水，大家就唉唉唧唧，目盯盯仔看等雨水號等歸隻運動坪，實在還慍悴哦！

毋過，落水天對佢來講顛倒係盡鬧熱个日仔。朝晨頭一出門，滿街路就係淦淦个車仔，這片嘩嘩；該片叭叭，像久見个朋友相借問樣，大家相賽講起恁久無看著个思念。該兜行路个人，擎等一支支遮仔花，分雨水一滋潤，就開出五彩个花來，行來行去像比麼人个花較靚。你係聽較真兜，該雨水打在車頂、屋頂、水窟抑係樹葉仔頂高个聲音全部無共樣，有高、有低；有大聲、

有細聲，像唱歌仔分你聽樣。成時，雷公還會用躡燼打燈光，用響雷伴奏，你講，係毋係已生趣？

佢當好在落水天打早就去學校，因為該兜平常時圓核核个蝓螺、蟲蟻全部都會趟出來搞水。學校圍牆係紅毛泥作个，壁頂个溜苔青里里仔，落水該下，蝓螺爬上爬下陣打陣，有个相賽看麼儕爬較遽，有个彎來幹去做起畫圖个藝術家，又有个停跔在圍牆頂高享受涿水个清涼，逍遙自在。

落水天出來搞寮个蟲蟻盡好膽，衫褲無著就緊拚拚仔出來搞水，溝壩肚朗朗滾个水流已刺激，幾尾蟲蟻分水沖過去還會搖來擺去，暢到奈毋得。有个蟲蟻大擘擘仔趟到路町來，較砸身个還做得趟轉去；較嬾个將就橫在路徑頭，分天公做主咧！

鬧熱个落水天，有人懊惱，有人歡喜，天公無法度分逐儕納意， 佢就愛自家改變想法，不管麼个天都係盡好个天。

(海陸腔) 編號 02 號

【阿公个杭菊】黃麗芬原作

毋知對哪久開始，阿公就逐日在該等天光。

一天光，阿公斯緊拚拚仔想愛出門，像去赴約會樣恁歡喜。佢成時用行个，成時騎自行車，就好滿哪仔走。佢毋會像別人逐朝晨在 LINE 群組傳貼圖問早，斯會去廟町拜神、在廟前个大樹下看人行棋，就算有打卡報到咧。佢最尾一站係在阿婆最好去个菊花田坐等看花、看樹、看人、看鳥仔，恬恬仔做無聲个交流，看過願咧自然就會轉屋，這係佢簡單生活个快樂。

有一日到臨暗仔阿公還吉轉屋，這係從來都毋識恁樣个。歸屋下人緊張到無結無煞，滿莊尋透透，最尾在菊花田町尋著。阿公哪知佢兜有幾愁慮，嘎毛蟹吊頸——尋無頭縴¹緊問：「菊花仰會做下無咧？」毋管佢兜仰般應佢，佢就係毋信，斯會闕猝猝仔緊罵講：「恁花舌！恁花舌！」原來，心愛个東西毋見忒時，理智線也會斷忒。

「阿公，你看！阿婆摺菊花——兩蕊花。」一轉到屋下，佢煞煞去阿公个間房拿出佢放在拖箱肚个相片，這係佢摺阿婆兩儕

在銅鑼九湖个菊花田町翕个，乜係佢兩子阿公个秘密。這張相片雖然有兜仔褪色，還係看得清楚滿田个菊花一蕊一蕊，有白也有黃，佢兜个笑容摺大自然个靚各有錫人个位所，無想著這嘎係阿婆過身後阿公唯一个回憶摺紀念。佢心肝肚知：「『情字這條路』个歌仔，阿公係仰般唱都唱毋會煞咧……。」

對該日起勢，佢兜胚想阿公交著一個新朋友，安到——「阿茲海默先生」。佢毋知係對哪位來个，三不五時會來尋阿公，來个時節都會帶等記憶个猝仔做等路送分阿公，大埕、細埕、麼个形都有。佢兩儕共下个時間緊來緊長、緊來緊鬥搭，阿公毋係奈到毋知好轉屋，就係買一千擔共樣共樣个東西轉來，還過一到又一到緊尋：「阿婆呢？」恁樣个情況實在分人愁慮，所以佢兜準備一隻胸章結在阿公个面衫町，胸章頂高寫等阿公个名仔摺屋下个電話號碼，續等詐意摺阿公講：「恁樣，阿婆就會摺你共下去看花咧！」真真假假，有夢最靚，希望相隨。

總會天光个！佢愛摺最遠个距離——「想念」拉兼來，摺最靚个記憶——「阿婆」好好囤在心肝肚。

¹ 毛蟹吊頸——尋無頭縴：音 mo\ hai\ diau\ giang\ ——cim mo teu tag；指做事找不到重點，摸不著頭緒。